



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

*Komunikadu Imprensa*

*Tribunál Distritál Dili*

*18 Feveiru 2016*

**Tribunál Distritál Dili kondena pena tinan 11 prizaun ba arguidu kazu abuzu seksuál ba menór**

Iha 11 Feveiru 2016, Tribunál Distritál Dili kondena arguidu JL ho pena prizaun tinan 11 tanba arguidu provadu prátika krime abuzu seksuál hasoru lezada ne'ebé ho idade menoridade, tinan 9. Kazu ne'e akontese iha 20 Juñu 2011, Distritu Dili.

Tribunál prova katak arguidu obriga lezada kaer arguidu nia orgaun seksuál no komete violasaun seksuál hasoru lezada maske lezada lakohi. Arguidu dehan ba lezada katak se karik ema ruma mai arguidu sei taka nia ho lensol.

Prova hirak ne'e, tribunál hetan bazeia ba deklarasaun arguidu, depoimentu hosi lezada no testemuña ne'ebé nu'udar lezada nia aman. Aleinde ne'e reforsa mós fotografia no relatóriu médiku hosi Ospital Guido Valadares ne'ebé relata katak iha duni kanek kois (*lecet*) iha lezada nia orgaun seksuál no ran ne'ebé husik iha lensol.

Ministériu Públiku akuza arguidu kontra artigu 177 alinea (1) Kódigu Penál kona-ba krime abuzu seksuál ba menór. Tuir Artigu 177 (1) Kódigu Penál define katak Se maka prátika koitu vajinál, koitu anál ka koitu orál ho labarik ne'ebé seidak iha tinan 14 sei hetan pena prizaun tinan 5 too tinan 20.

"JSMP apresia tribunál kontinua kondena arguidu ba iha prizaun maibé JSMP hanoin katak desizaun ne'e seidak la refléta ho gravidade hosi arguidu ninia hahalok. Aktu hanesan ne'e tuir loloos tenke kondena ho pena masímu atu hatudu ba publiku katak krime abuzu seksuál hasoru labarik nunka bele tolera iha comunidade," dehan Diretor Ezekutivu JSMP, Luis de Oliveira Sampaio.

Abuzu seksuál ba labarik iha kualker maneira tenke konsidera hanesan hahalok ne'ebé grave no ultrapasa limite normal. Tanba ne'e tenke kondena ho pena masímu hodi haruka mensajen ba comunidade katak atitude hanesan sei hetan kastigu ne'ebé todan.

JSMP mós hanoin katak importante ba tribunál atu konsidera hodi kondena arguidu sira selu indemnizasaun ba vítima. Ne'e prátika di'ak atu rekoñese vítima nia sofrémentu nu'udar konsekuensia hosi arguidu nia hahalok.

Indemnizasaun ne'e ho objetivu atu repara prejuizu vítima nian, aleinde ne'e bele hadia kondenadu nia hahalok. Indemnizasaun mós bele kontribui kria situasaun dame no armonia ba parte sira iha comunidade.\*

Kazu ne'e rejista iha tribunál ho Número Prosesu: 02200/11.PDDIL. Julgamentu akordaun ne'e prezide hosi representante juis koleтиву, Dr. Antonio Helder Viana do Carmo. Ministériu Públiku representa hosi Dr. Ambrosio Rangel Freitas no defeza, Dr. Jose da Silva hosi Eskritóriu Defensória

Atu hetan informasaun liutan favor kontaktu direktamente:

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)

---

\* Relasiona ho JSMP nia hanoin kona-ba indemnizasaun ba vítima sira, bele asesu iha [www.jsmp.tl](http://www.jsmp.tl) iha parte publikasaun-relatóriu anuál - [Relatóriu Observasaun Jerál Setór Justisa 2014](#) iha pagina 46 ho sub tópuku [indemnizasaun iha kazu violénsia bazeia jéneru](#).